

UTHM terima kemasukan lebih 2,500 pelajar baru

BATU PAHAT 6 Julai – Universiti Tun Hussein Onn Malaysia (UTHM) menerima kemasukan lebih 2,500 pelajar baru bagi sesi kemasukan Semester 1 2010/2011 kali ini.

Daripada jumlah itu, kira-kira 1,900 adalah pelajar peringkat sarjana muda, 400 diploma dan 200 pasca siswazah.

Pegawai Perhubungan Awam UTHM, Sharry Salim berkata, sesi kemasukan kali ini juga mencatat sejarah tersendiri apabila kumpulan pertama 25 orang pelajar Kejuruteraan Aeronautik turut mendaftar.

“Kejuruteraan Aeronautik merupakan program terbaru yang ditawarkan di UTHM.

“Graduan lepasan program ini bakal memiliki lesen penerbangan pesawat di samping mengenggam segulung ijazah kejuruteraan dalam bidang aeronautik,” katanya dalam satu kenyataan di sini, hari ini.

Kemasukan pelajar kali itu juga melibatkan pengambilan pelajar bagi program pesisir di peringkat pasca-siswazah.

Melalui program pesisir ini, para pelajar akan mengikuti sesi pengajian di pusat-pusat pengajian yang telah ditetapkan di seluruh negara.

Sebahagian besar pelajar yang mendaftar kali ini telah ditempatkan di beberapa kolej kediaman yang terdapat di dalam mahupun luar kampus induk UTHM di Parit Raja, Batu Pahat.

Naib Canselor UTHM, Prof. Datuk Dr. Mohd. Noh Dalimin dan pegawai-pegawainya UTHM turut meninjau proses pendaftaran pelajar dan beramah mesra dengan ahli keluarga yang mengiringi pelajar.



PROSES pendaftaran pelajar berjalan lancar dengan menggunakan kemudahan *online*.



DR. Mohd. Noh Dalimin (kanan) turut meninjau proses pendaftaran pelajar antarabangsa.